



Broj, 01-07-10-51-276/2024  
Sarajevo, 4.12.2024. godine

Na osnovu člana 25. stav (1) u vezi sa članom 26. stav (4) Zakona o slobodi pristupa informacijama na nivou institucija Bosne i Hercegovine ("Službeni glasnik BiH", br. 61/23) i člana 5. Pravilnika o postupanju po zahtjevu za pristup informacijama Visokog sudskog i tužilačkog vijeća Bosne i Hercegovine br. 08-02-3075/2010 od 2.9.2010. godine, 08-02-3645/2013 od 24.9.2013. godine, 08-02-388-1/2014 od 22.1.2014. godine i 08-07-2-3459/2021 od 29.9.2021. godine, rješavajući po zahtjevu za pristup informacijama Kasima Huseinspahića, [REDACTED], od 23.10.2024. godine, predsjednik Visokog sudskog i tužilačkog vijeća Bosne i Hercegovine donosi

## RJEŠENJE

### I Odobrava se pristup informacijama o

- odluci Visokog sudskog i tužilačkog vijeća Bosne i Hercegovine o imenovanju E [REDACTED] K [REDACTED] na poziciju sudije Kantonalnog suda u Novom Travniku broj 04-07-3-1539-1/2023 od 13.4.2023. godine;
- odluci Visokog sudskog i tužilačkog vijeća Bosne i Hercegovine o privremenom upućivanju sudije E [REDACTED] K [REDACTED] na obavljanje sudijske dužnosti u Kantonalni sud u Sarajevu broj: 06-07-3-1975-2/2023 od 14.6.2023. godine.

II Odbacuje se zahtjev za pristup informacijama u dijelu koji se odnosi na fazu istražnih radnji protiv sudije E [REDACTED] K [REDACTED] i to zbog nenadležnosti.

## Obrazloženje

Visoko sudsko i tužilačko vijeće Bosne i Hercegovine (u daljem tekstu: VSTV BiH/Vijeće) je 23.10.2024. godine zaprimilo zahtjev Kasima Huseinspahića, [REDACTED] (u daljem tekstu: podnositelj zahtjeva) za pristup informacijama kojom odlukom i iz kojih razloga je sudija Općinskog suda u Zenici 2023. godine izmješten i postavljen za sudiju višeg ranga u Kantonalni sud u Novom Travniku, te kojom odlukom i iz kojih razloga je isti sudija K [REDACTED] E [REDACTED] u 2024. godini iz Kantonalnog suda u Novom Travniku ponovo vraćen na Općinski sud u Zenici. Dodatno, tražena je informacija u kojoj fazi je istražna radnja protiv sudije Općinskog suda u Zenici K [REDACTED] E [REDACTED] vezano za, kako se navodi u zahtjevu, malverzacije oko stanova „Željezare Zenica" i drugim, gdje je u 2022. godini bio saslušan u akciji Federalnog ministarstva unutrašnjih poslova.

Razmatrajući predmetni zahtjev, u skladu s nadležnostima VSTV-a BiH, utvrđeno je da VSTV BiH posjeduje podatke navedene u tački I izreke ovog rješenja, te da omogućavanje pristupa

istim nije protivno odredbama Zakona o slobodi pristupa informacijama na nivou institucija Bosne i Hercegovine ("Službeni glasnik BiH" 61/23; dalje u tekstu: Zakon).

U odnosu na tačku I izreke rješenja pod a), uvidom u službenu evidenciju, utvrđeno je da sudija E████ K████ trenutno obnaša funkciju sudije Kantonalnog suda u Novom Travniku sa početkom mandata od 8.5.2023. godine. Odluke o imenovanju nosilaca pravosudnih funkcija javno su objavljene u „Službenom glasniku BiH“ a također su dostupne na web stranici VSTV-a BiH <https://vstv.pravosudje.ba> u kategoriji Aktivnosti/Imenovanja/Odluke o imenovanju, odnosno putem linka: <https://vstv.pravosudje.ba/vstvfo-api/vijest/download/102265>, ali se ista, zbog specifičnog statusa podnosioca zahtjeva dostavlja i kao prilog ovog rješenja.

U odnosu na tačku I izreke rješenja pod b), konstatovano je da je, shodno Zakonu o Visokom sudskom i tužilačkom vijeću Bosne i Hercegovine („Službeni glasnik BiH, br. 25/04, 93/05, 15/08, 48/07, 63/23, 9/24 i 50/24; u daljem tekstu „Zakon o VSTV-u BiH“), odlukom VSTV-a BiH o privremenom upućivanju sudija u drugi sud broj: 06-07-3-1975-2/2023 od 14.6.2023. godine, sudija Kantonalnog suda u Novom Travniku E████ K████ i još dvoje sudija ovog suda, privremeno upućeno na obavljanje sudijske dužnosti radi pomoći u otklanjanju zaostalih i neriješenih predmeta u Kantonalni sud u Sarajevu, na period od 12 (dvanaest) mjeseci, počevši od 1.7.2023. godine do 30.6.2024. godine. Po isteku perioda važenja privremenog upućivanja, sudija Kantonalnog suda u Novom Travniku, E████ K████ nije više privremeno upućivan odlukom VSTV-a BiH u bilo koji drugi sud na obavljanje sudijske dužnosti, te se konstatuje da on i dalje obavlja funkciju sudije Kantonalnog suda u Novom Travniku, odnosno da nije došlo do njegovog premještanja u Općinski sud u Zenici, kako to navodi podnosilac zahtjeva.

U odnosu na tačku II izreke rješenja, konstatovano je da VSTV BiH nije vlasnik tražene informacije, a imajući u vidu nadležnosti institucije propisane u članu 17. Zakona o VSTV-u BiH, odnosno ne posjeduje informacije i ne može uz razumno uloženi trud utvrditi koja institucija BiH je vlasnik informacije o navodnoj istrazi protiv sudije K████ E████, stoga je u skladu sa članom 23. stav (8) Zakona o slobodi pristupa informacijama na nivou institucija Bosne i Hercegovine ("Službeni glasnik BiH" 61/23; u daljem tekstu: Zakon), zaključeno da se zahtjev u ovom dijelu odbacuje zbog nenadležnosti.

Postupajući po zahtjevu podnosioca, a u skladu sa svim gore navedenim, odlučeno je kao u dispozitivu ovog rješenja.

#### **Pouka o pravnom lijeku:**

Protiv ovog rješenja podnosilac zahtjeva ima pravo podnijeti žalbu Žalbenom vijeću pri Vijeću ministara Bosne i Hercegovine u roku od 15 dana od dana prijema istog.

Ukoliko Žalbeno vijeće ne odluči po žalbi u roku od 30 dana od dana prijema žalbe, podnosilac žalbe ima pravo pokrenuti upravni spor pred Sudom Bosne i Hercegovine zbog šutnje administracije.



Prilog:

- Odluka VSTV-a BiH broj: 04-07-3-1538 od 13.4.2023. godine o imenovanju K████ E████ za sudiju Kantonalnog suda u Novom Travniku

- Odluka VSTV-a BiH o privremenom upućivanju sudija u drugi sud broj: 06-07-3-1975-2/2023 od 14.6.2023. godine,

Dostavljeno:

1. Podnosiocu zahtjeva
2. Odjelu za imenovanje i napredovanje
3. Odjelu za pravosudnu analitiku i izvještavanje
4. U spis

